

6 Maart

Psalm 126:1-6

(Teks: 126:5, 6)

Uit trane word vreug gebore

Die Israelitiese boer loop moeisaam en struikelend oor die geploegde land met die saadsak oor sy skouer. Hy strooi vars koringsaad op die goed voorbereide akker uit. Skynbaar 'n vreedsame toneel van 'n boer wat sy hart uitleef op sy wenakker en in sy drome die wuiwende graan in die wind sien buig, die goudgeel are oopbuig en laat golf as die wind daardeur suis.

Tog sing die lied dat alles nie so idillies is nie. As jy maar in sy hart kon lees. Sy hart ween, want uit die saad moet die oes kom wat sy welvaart, sy brood en botter en die voorspoed van sy gesin verseker. Sal daar genoeg reën val om 'n goeie oes te verseker? Sal somerdroogte dit verskroei of sprinkane soos 'n wolk neersak en alles verteer?

Wanneer die sekels egter in die son blink en haal na haal die ryp koring neervel, dan het die boer se lot verander. Sy hart is vol lag en dankbaar juig hy tot eer van die Here.

Uit trane word vreug gebore. Trane want die mensheid buk onder die geërfde sondelas van sy eerste voorouers. Onder trane moet hy sy roeping op aarde vervul. Maar in die voorsegging van die koms van Jesus Christus is sy lot verander en beseël. Met Christus se geboorte het die groot Versoener die trane afgedroog en die gejuig van die Koninkryk van God laat opgaan.

Die trane wat die aardse kommer veroorsaak, verdwyn nou in die feestelikheid van God se koninkryk.

Dr. J. van V. du Plessis (Welkom-Noord)